



嚴文靖公集卷之十一

傳

史玉陽公傳

玉陽公溧陽人也溧陽蓋有漢溧陽侯史崇塚云而侯四十四傳為贈給事中慎齋公祚又傳為光祿少卿知山公後而光祿娶於王生際字恭甫是為玉陽公云今海內諸史多苗裔於侯而在溧陽者號多宛財世世連櫬擊鍾為江左甲族而光祿為給事中在南京諫舍時魏國莊靖公鎮南京道

逢給事中意氣揚揚魏國初傲視之既而英傑遇之給事中方喪王孺人未繼魏國因以女妻給事中給事中據要路年終弱冠耳家又世饒魏國貲送其女又甚盛而勢滋張給事中素任俠自喜而至是尤好豪舉而王陽公為舍人則已有才子稱後以太學生奏藝於魯司成鐸魯公故南省元意藐士而獨魁磊一史生試輒寘史生首它日又以所撰著為太史崔公所賞識而王陽公文譽於是籍籍嘉靖乙酉舉於鄉歲壬辰第進士除禮部精

膳司主事禮部雖省曹而其地清峻稱外翰進士擬缺必用高等而王陽公以儒雅見推居郎署間所與天下才望殆盡名日蔚起而會吏部遴考功屬咸曰史君閱人多望且宿宜遂令居人倫地故王陽公徙考功為考功有聲又徙文選選格滯且殺者坐關節子而王陽公既自富方福利不遂賄才又通敏選遂清一時居頃之皇太子出閣有詔擇東宮官屬而近臣中數賢有才又多屈指王陽公者於是與前太史唐公順之羅公洪先等一

日同被薦玉陽公官遂改春坊清紀郎兼翰林院
侍書而士有請謁失意者竟論止其進王陽公坐
是免歸家居常深念富貴者人之所最觸爭鬪戰
寧甘僂辱亡其軀而不為衰止者而過享之則身
必危在昔范少伯知足以知之矣而史載其去越
適齊三致千金而散之非迂也今余官為郎雖非
臚仕而其先有事產埤之以祿竊憇不克勝吾將
為少伯乎乃絕意仕進去其家幾百里陽羨山中
近少伯所嘗扁舟泛湖處考卜盤桓之廬為重坐

曲閣高廊四注杳眇如列仙之宮而居之其跡日
深以藏而人之慕聲光干曲謁者自貴游以迄山
人海客水浮陸馳日雜選於其戶而玉陽公皆揖
而進之既見有饗致館致積饗殮醴牢鸞菹醢醢
之物畢具而客即彈鋏而歌無倦色既辭歸又腆
贈君子以謂玉陽之於客也真不媿古平原孟嘗
而玉陽公自是顧愈益富而愈益好行其德嘉靖
甲午乙巳圻內民數被灾薦飢玉陽公為發其家
紅腐餉有司者動以萬計而庚申辛酉灾尤甚至

親駕跋履民蒿萊間物色甦餓者飼之而生活老
稚視昔較衆天子以撫臣奏旌其門溧陽之墟有
壤滄者焉弃不治王陽公行見之則計曰此可以
耕而貯穀其間異日為賑民地乎乃捐粟若干傭
頗領民數百深其滄為池而畚滄之土為田凡得
田若干畝歲得粟若干石因監倉貯所收入而旱
潦有備名之曰救荒滄其經制擘畫委折具唐太
史所為記中夫今天下多弃壤蒼莽不可勝計而
溧陽以王陽公故皆化滄為沃固知人力有遺漏

也乃撫臣有周公者亦下令置倉郡邑鄉社如玉
陽公指實軫東南灾沴也而王陽公即先民將順
輸三千金相其役周公去後數年海公至海議鑿
吳之淞江其德意猶之周公而人情難與慮始憚
而有繁嘖王陽公又輓穀二萬石樹赤熾其他為
收族作義莊作家塾為風民葺溧陽學作嘉義書
院新泉書院院與學皆贍以田費亦不下若干千
金故事民間質邸火邸主例不償民質王陽公邸
在溧陽者質號直萬金而頃歲不幸灾而民皆以

例故不敢言償主玉陽公獨以謂民貧故出質今
質喪將愈貧吾不忍民之限於例而噤不敢言也
具償之人謂其所失者萬而償復萬即富亦太損
則皆私壽玉陽公玉陽公愛人里中人有偏于險
難危於疾疢者或稱貸玉陽公玉陽公必賑以財
乃其後貧不入玉陽公即又取其券付之火玉陽
公揮斥賞如賦土每如此以其故車騎所至丐請
填塞而仙釋家名山道場津梁古蹟有沒于蘼蕪
淪于瓦礫而不即治者治之則其費千金若五百

金數十金必之玉陽公焉去國遊士窮途羈旅篋
胠釜奪樵悴躑躅莫可控額而皇皇焉欲急抵者
必之玉陽公焉龜筮日者青烏望氣諸家惟術幸
試借書郵以為檣介者必之玉陽公焉而玉陽公
於一切糜至槩弗拒歲所投畀刀布物貨視三散
千金或過之然是時域中泰無事玉陽公即博施
徒與民便利不獲以其身其家所出輸葵藿用于
朝而廊廟亦以玉陽公老在江湖久不之省矣嘉
靖甲寅乙卯間會日本夷起東南守臣力不能攘

扞其塗肝腦吳越閩廣間日甚馴欲窺白下玉陽
公聞之擱然奮曰世無弦高卜式遂縱夷至此誰
謂際徒長犬馬齒不能為國家出死力効標末之
功令民束手坐受夷屠刃耶乃即出千金購四方
梟俊訓以控拳搏檝坐作止齊諸陳法可用矣因
遂率之與夷鏖于震澤西敗之而是役也玉陽公
蓋幾殆不救他日又有夷七十餘酋者雄傑號不
制自瀾抵蘇轉鬪而南徑趨石頭犯郊門不克又
舍而東下次于舊溧陽城玉陽公帥師迎之戰不

利沒其敢死士三十有四人而夷亦戰憊疲走玉
陽公竟督兵追北斬之而是時討賊兵四集官無
餼糧或以語玉陽公玉陽公即又漕米五千餉克
濟於是撫按臣皆以其功聞 上曰朕實嘉際忠
義其徒際尚寶卿加四品服色蓋金緋也而玉陽
公登拜益感激上思殄夷矣乃歲丙辰夷嚮道渠
魁徐海者寇平湖遂巢穴之我師討之者有議燹
蕩持不決而會玉陽公來咸謹曰史公師中丈人
宜就諮進止玉陽公竟蔽前筴及兵進揚燎夷望

見突竄而王陽公兵從左右翼擊殲夷盡督撫及
紀功憲臣復聞之 上愈喜以史卿年高猶矍鑠
能冒矢石制勝然志不在勲伐矣第進徙貳太僕
卿於家不令視事而子繼書則錄為錦衣衛百戶
王陽公建豎固傲儻慷慨而為人又孝謹篤其懿
親少孤育於大母王繼母徐即魏國女遂終身啣
戢報德力竭生死焉而挺身赴光祿之難疏雪最
哀懇及卒哭之性幾滅宗人遍遐邇有賀弔使必
遣而歲時上溧陽侯塚甚虔即風雨弗爽亦弗使

人代其贍宗則急貧者其造子弟則先茂異者尤
愜人心云前部使者當其生時嘗以其有所助於
學也令博士弟子即學宮祠之固以酬之亦因以
風厲其他歟王陽公生於弘治乙卯八月二日卒
於隆慶辛未三月四日年七十有七配蔣生子二
繼源繼書繼源國子生先卒繼書繇錦衣百戶進
指揮僉事孫致唐致化致唐國子生皆才雋文武
競起彬彬世其家 養齋子曰曩余仲子澄有女
而王陽公命錦衣聘之為孫婦今兩家子女皆殤

而史與余家實有蟬嫣之誼焉玉陽公惠顧余余嘗接之見其貌恂恂悃悃外鮮銜飾若無以異于人者而其所挾貲至傾動天下凡人繫千金即濫滿汰侈招尤而玉陽公以甲科美宦居天下殊貨能廢與運斡不動聲氣而銷人之伎竟以敵愾揚勲跨騰風雲令搯擊遊談者以為稱首竊為其逢辰幸之既而聞其在太學時天下熙熙皆敝精利祿而玉陽公獨簞笈後先遊王湛二先生門講其學舖腴啜醇融礙釋滯然後知其居潤屋有道如

子貢得聞教於孔子然者而范少伯亦不足道也不然人之富埒玉陽公者亦有矣而獨其名譽日至于朝宁之上歌頌四達於編蓬之下何為者耶余故為著之令世之積鏹膾粲豢酣於富祇自雄植而不知有君與民者省焉

雜著

敬一亭頌

皇上御宇之五年作敬一箴又註程范五箴命共立石翰林及頒布天下臣少游鄉校嘗拭目莊誦

獲睹古帝王之學矣乃歲辛丑第進士猥得應
詔讀書翰林巍然實貯奎翰朝夕在目嚮往有
宗因自思之君為堯舜伊尹所為幡然堯舜之道
實具精一執中之傳今
皇上有敬一箴是固深得其道而又善發揮者蓋
皇上即堯舜也

聖人既作萬物快睹則雖天地高厚有不易於形
容然颺言遂歌古臣子亦有之豈以臣涵育
聖化之中且列名於詞林而可無所以鳴其盛美

者乎故輒忘其愚陋敬拜手稽首而作頌曰維聖
有學莫先治心王度斯昭式玉式金粵自隆古執
中是命帝王相承維烈無競於赫我

皇天實生之縱之成聖能自得師曰維執中心法
既具維敬維一中道所聚則著是箴闡厥精微大
哉

玉言二曜侔輝堅珉既勒作亭以貯匪飾外觀無
逸是所昔在

高廟觀心有亭夙夜匪懈操存虛靈大業肇啟景

命永附

神孫纘緒繩其

祖武維茲雄構翼翼具瞻

聖謨攸存對臨孔嚴萬邦作孚萬民作式載用有
嗣駿惠無斁

上巳祓禊解

或問余曰上巳祓禊周禮昉之風俗通釋之韓詩
道之漢若晉唐書紀載之信有諸乎解之曰有之
而君子不由也人之祥不祥天主之也天之祥不

祥乎人也因人而施之也人苟善矣天祥之人苟
不善矣天不祥之天固無心人則不得而趨避之
也何用於祓禊為也且天地之大德曰生其太和
流行兩間莫非一元之運本無有乎不祥也其有
不祥則人自戕其和而取之非天地之心也何用
於祓禊為也祓禊有道仁以洗心義以浴身禮智
信以澡濯性情取新於湯銘去汨於箕疇是則祥
所繇臻而不祥所繇祛者也天子循是無不祥於
天下諸侯循是無不祥於國卿大夫循是無不祥

於家士庶人循是無不祥於身既無不祥不祓禩可也反是而日祓禩無益也况乎人之以善不善而感召乎天之祥不祥無定時者也其於春於秋於躬於子孫主宰弗差神化靡常久矣其莫可測也詎泥於上巳也故上巳祓禩君子不由也

察舉遺風冊引

吾邑朱東河先生德學並隆之君子也科試拜選兩不酬志士人咸惜之曩先生往主漳浦邑簿時予嘗有贈言懇懇道此意矣先生佐邑以來政績

果大著侍御金雙渠公命署漳平邑篆移檄獎之謂其以文學飾吏治以古道濟時宜風操有冰蘖之聲牧養有父母之實蓋異等之褒云而其郡守盱眙王田盧公雅重先生至為序其所修漳平邑志且作詩以畀之如左嗚呼盛矣夫古之刺史若次公仲卿之徒俱得以意察舉其屬至為大官者蓋其臨之至親而識之至真苟公焉無所私宜鮮不任者而何必以昵所屬為嫌也余每觀於兩漢盛時未嘗不羨古道行於古人乃今制則蔑矣刺

史於其屬之賢者第考其所以為賢以待繡衣之使而已而繡衣之使雖知其賢亦以今制不得舉丞尉也其以聞之朝堂者寡矣是以先生雖賢盧公雖知先生賢金公雖誠知盧公知先生賢竟亦不以薦聞噫此豈非時制所使然乎推盧公心嚮使制得如兩漢時也先生首在所察舉無疑矣今即限於制盧公志古之道不可嘉乎上下之間亦豈不相與有成乎哉先生錄盧公詩揭之壁間以示鄉之人以為榮而先生仲子檜峯叅軍因置巨

冊徵諸搢紳屬而和之將以傳於人人遂告其子孫俾世守以為重也公與先生之賢蓋可交托之不朽矣余乃題其端曰察舉遺風謂盧公亦猶行古之道而因以示將來者云

奏疏

東南寇災請蠲恤疏

翰林院侍讀臣嚴訥謹奏為東南被寇地方民困已極懇乞

天恩特賜恤處以濟生靈以安根本重地事臣伏

見

陛下如天之仁覆育寰宇而於小民疾苦加志尤急

臨御以來歲澤覃敷臣不能殫述即如頃歲薊遼以虜警告徐淮以河溢告畿輔以雨澇告

陛下皆軫念而重矜之或發穀賑濟或遣使存恤他如平糴設粥以及散藥埋胔凡所以惓惓為民而解其窮厄者誠如父母之於赤子無所不用其心臣之私心竊以為

陛下之於民隱苟未之知焉斯已耳苟知之而不亟拯之使得其所者非

陛下之心也今者東南被寇之地生靈塗炭極矣臣雖愚陋能不仰體

陛下愛民之盛心而為一訴其艱苦迫切之情於君父之前哉倭夷自嘉靖二十九年入寇浙江黃巖餘姚等縣去年乃至蘇杭等府太倉上海等州縣是時臣方蒙恩省親在家嘗親見其事矣蓋此寇於民居稠聚之中鼓刀恣殺繼以縱火肆焚

室廬民多橫罹鋒鏑群投烈焰其壯者猶或狂奔
自救然亦皆失於故業雖僅免一時之淪喪而糊
口無計終填溝壑而其老稚者則委諸中路不能
以顧其為官府所召募併素載尺籍為兵者皆柔
脆不教之民如驅羊擗虎盡斃於賊其稍有家業
者日夜併力守禦供應軍需即細民覓刀錐度日
者或運解軍餉或裝載戎器亦多號呼以死而不
能以自活其他賊所未經之地則皆聞風而怖空
室而逃子棄其父夫棄其妻而臣於是時亦且奉

臣父母遠避他所矣瘡痍滿目流離載道丘墟千
里惟聞哭聲目擊耳聞痛心疾首自是倭寇滿載
而歸自以得志比及今年益擁大眾自焚其舟為
深入之計始攻松江次攻蘇州次攻浙江嘉湖揚
州通泰之間如各該地方撫按等官所奏報者勢
益猖獗計其所殺傷燒燬奔亡之慘蓋不知幾倍
於臣所親見之時聞之鄉人逃生至京者皆云賊
黨所據無地無之而地方之人則枕骸遍野而蕩
無人烟矣慘毒至此何忍名狀夫財賦出於五穀

而五穀生於三農東南地無遺利人無遺力老幼俱作終歲勤動是以田畝所入公私皆賴今兵燹之餘民幾無子遺矣雖有戶田而誰與耕乎耕既無人而穀何自而得乎穀無所得即饔飧之資無纖毫矣而公家賦稅何所從出乎竊照每年遇有水旱之災先期農人告於有司有司聞於撫按撫按委官踏勘是實然後以奏於朝下於戶部行於主計者而量其分數以免之今之災比之水旱之災何啻百倍蓋不待踏勘而後知者然而無告

災之人矣有司無所據以為請而撫按無所據以為奏縱使撫按有司念及於此但今賊勢尚熾戎務方殷方將日夜禦賊之不暇而何暇輒及農人之事若臣今不陳於陛下懇乞

天恩早下免稅之詔縱地方事寧而稅期已及允軍又且臨境臣恐有司不敢預必朝廷之意而假斯民以法外之仁瘡痍者未甦而加之以捶楚虜繫者未還而繼之以縲紲小民既已失其常

業無所藉以為生而又懼不免於有司之法於是
流移之民其善良者遠去其籍不思復還而其狡
健者不肯甘心待死朝夕則皆起而為盜或投入
倭黨為彼嚮導或隨入島中多其徒黨或招集本
地無賴烏合成群乘間竊發恣行劫掠若今無錫
所報盜徒之類亦既已有之矣而况可驅之使然
乎此其人亦非不自愛其身也亦非不有懼於
國法也其心以為與其束手以待斃不若且苟得
以活湏臾之命即使他日被獲而死亦猶愈於今

日之即死也是亦其勢不得已而然耳夫流移者
去籍而不還則拋荒之田愈多而益蕪狡健者驅
而為盜則倭黨日衆其勢愈益難撲即使撲之而
本地之盜乃不可勝詰矣紛紛之患將何時而息
乎夫懼其田之益以拋荒則於流移之民不容於
不招夫懼其盜之未息則捕盜之格不容以不設
此其勢蓋不至於發公帑給公粟不已也則是今
日之徵於民者有限之虛求而他日之出於公者
不貲之實費利害之相去豈不明甚哉故臣以為

與其他日以在公之財而為招集流移之用孰若
捐今日之未收於民者以示勞來之意遂鼓舞其
欲歸之心而因以安輯之與其迫徵於今日以速
其為盜孰若示之寬恤開其生業以潛弭其為盜
之心而永為吾力穡供賦之民臣非不知 國家
之賦定有常額不可輕議且目今西北仰供甚急
司農經國方爾無措而胡可遽以捐之但今民困
一至此極雖欲徵之必不可得而况利害相懸如
臣所云然者若從而捐之則今年雖缺幾許之供

而明年以往可不復失故臣所言不徒仁民之圖
而實所以為裕國之計不徒安養東南而實所以
深為乎西北者也臣亦非不知賊勢既寧之日撫
按有司終以 上請但其時已晚無補於臣前所
陳者且其所請亦不過因襲免荒事例於存留內
乞得分數耳夫 國家起運之數大率十之七八
而存留之數則十之二三縱使存留之數盡蠲亦
不過十之二三耳其起運之數十之七八者必復
取辦於民也夫民救死不贍方且待賑而猶責之

以七八分之供與之以二三分之蠲是猶遍體殘
矣而益之以一毛臣不知其有濟於民乎否也臣
嘗查得洪武年間 詔免太平等府夏稅秋糧不
一而是夫當創造之初百廢具舉豈無待於用者
而何以數蠲民賦為也蓋天下甫定固當休養民
生而此數郡者陷亂日久最先師征供役浩繁民
力尤竭是以不得不汲汲焉思以仁之也蓋嘗伏
讀

太祖之詔有謂縱使不免亦無可徵者至哉 王

言誠見之的矣今日蘇松等處何以異於太平等
處而今我

皇上之仁亦何少異於

太祖之仁臣誠願

陛下特敕該部查照東南未嘗被寇地方其農人
得以耕種如臣祖遺薄田幸在滄次未至全荒者
照舊徵賦外其曾經倭寇擾害地方見今無餽下
戶菜色沾亡者 敕令撫按有司設法賑濟其委
係妨廢農功田地暫將嘉靖三十三年夏稅秋糧

一應起運存留通行蠲免仍 敕該部作速行文
撫按頒示有司使乘稅期未及之時張掛榜文使
民通曉

陛下德意庶幾良善不肯為盜之人知官府之不
迫其稅而自幸其生之尚有可恃稍稍脇息延望
歸尋其故業於流離未盡之餘而以其鋒刃之餘
生盡力於畎畝則民之死者固不可以復生而生
者可不至於復死雖其已嘗為盜及今將隨流者
亦且翻然悔罪樂於自新以求並生育於堯舜之

世斯民生可永奠而 國計可永賴矣其江浙淮
楊鹽場地方今年倭寇所經之處竈丁之被害而
死徙者當亦不少合無一體寬恤 敕令各該官
司賑其存者召復其徙者以養其後則鹽課亦不
至失墜矣再照防患當先於未形而人情多弛於
事後去年寇至之時人莫不謂今惟變起倉卒是
誠莫可柰何過此以往必為預備而今年之寇乃
反加劇其狼顧失措坐受剝膚比之去年反覺尤
甚此其故何也臣竊思之矣往年寇經之處民間

已困而郡縣倉庫費且告竭比至寇去地方當事諸臣亦非不虞今日之必有此而欲為之所也一應召募勇壯戍守要害置造戰船重懸賞格之類俱緣未嘗奏請不敢輕動錢糧是以束手無策竟至於此乃者

陛下特簡重臣調兵征勦 命戶部於起運錢糧內聽留二十餘萬 敕令重臣便宜支用

陛下神武明見何以加焉今 天兵所臨威聲震動彼狂寇者必且計日而就擒矣但其餘黨在島

中者一時亦或不能盡滅來年事勢尚或可虞設若今年仍蹈故轍而一切支持目前不計深遠則來年之追視今年安知不如今年之追視去年也預備之圖誠所當講而欲圖預備必資錢糧臣愚以為若今聽留數內足用則已倘尚未足容令諸臣詳計所費再行奏請以便展布庶幾事事有備永弭慮患而

陛下南顧之憂其釋矣乎再照調到各處之兵如狼兵長鎗手等項固為驍悍可用但此輩貪殘之

性不減於寇今 國家不得已而用之則怙其強
勢而肆然侵掠於民所不能免者然使彼遠離鄉
土棄室家之安而跋涉千萬里外出死力以赴戰
苟非豐其餽給優其賞賚亦何以足其欲而安其
心今若錢糧果敷則欲厚此輩固無難者既厚此
輩然後責令將領申明號令嚴加禁戢使之遇賊
則戰賊退則安處空閒以待調用凡其所資以為
費者一不得橫索之民間其或有強暴不率者許
小民赴告即將軍法從事以警其餘則師徒駐境

無乏食之憂而閭閻按堵無重擾之患此亦軍民
兩利之策也臣本蘇人忝列侍從故敢輒以地方
事冒昧上陳伏望

陛下留神采納萬姓幸甚

書

水災與師相太岳書

謹啟水旱堯湯有之堯湯之世不以水旱為不幸
而以有堯湯為幸有堯湯即水旱何憂而遠足以
彰堯湯拯水旱之仁焉吳賦獨重於天下而蘇松

纂甚國家強半仰給可謂根本重地也遭倭兵燹後財力日耗公私俱困甚矣往歲大水為災諸縉紳爭言而生獨不言蓋知翁之必有所處而無待於言耳既而果蒙 聖恩允撫按所題請蠲賑改折超每歲之常格民沾惠者得以聊生蓋垂斃而復甦既流而復還者不可勝計也又 詔旨明切禁遏剽劫有司奉行惟謹捕其尤者痛加鋤抑而又多設方略防禦周詳由是釁銷於市攫而變弭於潢美者又不可勝計也蓋 朝廷恩之所施威

之所制皆翁有以襄翼之而功德誠無量矣今歲滿望有年無煩 朝廷軫念詎意入春兩雪浹旬菜麥黃槁自閏四月既望至五月上旬大雨連綿晝夜傾盆蕪之潦積潮漲洪水橫溢小暑前後狂風霪雨驟至加甚往歲之水可謂大矣而今歲水痕更增尺許一望巨浸遍野行舟圩岸坍塌而川原莫辨屋廬飄蕩而依棲無所禾苗之已蒔者盡入波濤之中而未蒔者將何所措手此其勢不容不散之四方而轉乎溝壑疫札枕藉殍殣載道顛

連之狀目所日覲悲號之聲耳不絕聞父老相傳
以為實異常希有之大沴也夫今歲之水甚於往
歲之水而今歲之民則又苦於往歲之民往歲猶
有穀種可播也猶有屋茅可薪也猶有妻孥可鬻
也猶有農具服器可售可質也猶有大戶之家可
倚而稱貸或傭工食力也而今歲則皆無之矣賴
有國法燦明犯之難逃是以鄉村草竊雖多而
未敢成群肆掠然此風漸不可長而將來尚有隱
虞貼亡之餘人情洶洶是可惻也亦可慮也夫翁

胞視斯民致主澤之而以不忍人之心行不忍人
之政久矣生屢覩邸報莊誦綸音勤恤藹然明良
一德實切欽之戴之者亦久矣今民有不獲生謂
翁是惟無聞焉耳聞則必閔仁之而加志以拯之
無疑也頃者撫按亦既䟽達而民困極之情狀恐
猶未能盡其形容諸縉紳知生在翁愛末而從吏
生述而告夫優於經濟翁之餘事翁既知吳民困
極而閔仁之而加志以拯之此何難者而生安所
贊其末議也第輿人之意不欲但蠲存留之數而

欲於正供額內大超常格蠲之查照近題事例將
臨德二倉所儲撥補起運庶使民得實惠而垂斃
復甦既流復還者比之往歲為益多也其市攫之
釁潢弄之變潛銷而默弭者又比之往歲為益廣
也而 朝廷恩之所施威之所制又皆翁有以襄
翼之而功德益無量矣夫古今論冲主之聖必稱
成王論相冲主者必稱姬公今跡翁所為帝鑑圖
說之類如前書所稱者固種種趾美於薦柴矣然
史又稱成王之時民庶而富醇厚刑指而說者謂

太和在成周宇宙間翁今拯吳百萬生靈使亦富
庶而興於醇厚之俗焉則宇宙太和永永在今而
成周豈獨擅之哉而輔理成化之功又豈獨姬公
為章章哉且翁活人既多而食報於天者必厚高
門奕奕結駟仍仍將又有紹今傳後而勿替引之
者矣生知翁之知生又知翁知生之知翁也用敢
因諸縉紳之所從史而冒達之如此臨啓無任惶
悚

水災與師相鳳磐書

謹啓蘇松之賦獨重於天下正宜為仁者之所閔
念其賦即有逋者亦其力實有所難支而其勢欲
不逋而不能耳此在仁者尤宜閔念之也乃有謂
蘇松人善逋賦而獨蒙詬焉此譬如或負百鈞適
千里勞憊萬狀暫淹半途而逸居坐視者不肯設
以身處其地而難之而顧謂其黠以偷力而噍讓
之豈不寃甚矣哉豈不寃甚矣哉蘇松連歲以來
咸被大水庚辰之歲生已具啟專力馳達既而思
之山林病夫豈可輒與 國事且當 朝廷綜理

明作之際又非野人迂濶以惇大為說者所當恩
撓遂避越俎之嫌逡巡猶豫所遣力已就道而復
追之使還前啓徑未之達其明年則又大水矣至
於今年則又不啻大水勝前而已風潮陡作猛狹
雨勢拔木飛瓦其變異常江海騰衝室廬漂蕩男
婦墊溺而傾家殞命者殆不可勝計洪潦漲溢到
處巨浸野無青草一望成湖較之往年民被禍患
尤毒尤慘仁者閔念又當何如也頃見邸報吏部
覆朝覲本 聖旨中云近來在外各官多不體朝

廷奉天子民之意務為矯激操切以剝削取名吏治何由而興民生何由而遂又兵部覆浙江撫按官本 聖旨中云近來各地方官徒務節省虛名徃徃過為裁削致事體窒碍難行為軍民害 絲綸廣播海宇忻傳而 密勿論思 天言口代此正仁者之用心而元元更生之時也且昔胡中丞雅齋公撫吳會以水荒題請蠲賦其志莫遂至引疾去而近見邸報則 廷推公論陪點少司馬矣昔所弗韙今所復用政府德意昭然可闕至治之

澤行見元元得以遍被生用是敢斗膽僭達遂以昔所欲上之書稿而仍奉焉以見生之夙心夫非常之事當以非常處之蘇松連被大水之災已經數年於茲矣中間雖屢蒙 聖恩有所蠲賑然蠲賑者有限而飢民不勝其多每年大無麥禾民不聊生其斃於凍餒者無算其斃於流移者無算及若催科勾攝嚴限比併其斃於鉗箠之下犴狴之內者益無算夫民命至重不類草菅民即犯大辟法當斃矣猶復臨刑覆奏至再至三此在一人之

命且然况群生之命乎犯法之最重者且然况原
無秋毫犯法者乎何忍使之飢斃而至於無算也
伏讀 新旨所云務為矯激操切以剝削取名又
云過為裁削為軍民害大哉 王言真洞燭民隱
而軫念民瘼矣夫一裁削間而軍民遂敢相繼生
變其飢斃者之無算何啻浙省一處之軍民其欲
生變之心諒與浙省之軍民亦何少異然自數輩
剝劫之外其餘寧甘飢斃而不敢生變者徒以法
制禁令之森密也數年以來民即畏法不敢生變

而草菅民命則在仁者必有所不忍矣夫烏窮則
攫獸窮則搏人窮則盜理有固然今勢則孔棘矣
安保其無剝劫生變如曩時之數輩如頃軍民之
在浙省者乎是不能無隱虞焉即無隱虞而
新旨所謂吏治何由而興民生何由而遂者信有
如斯言也蓋聞仁者之於天地萬物視如一體而
一夫不獲輒引以為已辜天下有飢輒曰由已飢
之蓋昔聖人任天下之重而操造命之權者莫不
皆然而今在高位之仁者則正老翁是也而能不

仰望之切乎愚竊以為今年水災既大倍於往年
則今年之恤之也必不可仍照往年之例湏於正
供常額徑行盡數蠲免不但止免存留亦不必復
議改折若曰止免存留及復議改折則與往年之
政無大相尚而民之飢斃者依舊無算道塗溝壑
殍殮仍多田野閭閻怨嘆仍多其何以副東南望
霓之心而解蒼赤倒懸之急哉老翁若大超常格
悉蠲全賦則今日改絃易轍之新政轉日回天之
大力調元贊化之芳猷天下戴恩而快之後世傳

美而誦之而成周恭和富庶之隆趙宋元祐鼎革
之良豈得獨擅於徃代獨耀於前史哉緣仰特雅
愛且仰體盛心輒敢冒昧啓瀆伏祈矧答

嚴文靖公集卷之十一

嚴文靖公集卷之十二

祭文

祭師相徐存翁文

維萬曆十一年癸未某月朔越某日太子太保吏部尚書武英殿大學士眷晚生嚴訥謹具香帛牲醴致祭於元輔存翁老先生徐公之靈曰乾坤間氣嶽瀆鍾祥名世挺生邦家之光世廟龍飛明良慶會擢第唱臚卿雲協瑞石渠簪筆藜火校書學貫古今相材夙儲翊聖忤權抗疏落職踐敷建豎

忠厚正直虞門既闢霄漢翱翔遍歷清華台斗文
昌始範咸均繼攝銓柄乃晉秩宗乃司鉉鼎忠佞
並列杓鑿危疑明哲匪懈潛回化機啓沃燮調國
本斯植鄴侯魏公計安社稷穆宗在諒遺詔意承
密勿都俞寰區救寧世方賴公公則勇退溫綸慰
留莫徂公志組解北關帳設東都躡傳裴相功成
弗居綠野平泉悠游歲月保艾頤和躋於大耄今
皇念舊敕使勞存幣錙饋醕周儀漢文金緋滿門
桂玉繞膝國恩奕世家法萬石揆理度數眉壽無

期胡然厭謝一旦騎箕改歲之間慶吊反掌木介
含淒山頽曷仰某也晚進沐愛洪深迪我道術勵
我官箴人亦有言入朝見嫉公繆采葑引薦帝側
任侔權埒人或相傾公亟推轂政府同升某登龍
門步趨軌轍為役無能同心以竭我匪公媚公匪
我私蕭規曹隨公實我師疇昔在朝追隨劍履歸
歟以來願侍杖几方擬耆社永締貞盟訃音忽聞
豈勝怛驚既而念公榮哀終始屈指宇宙如公有
幾曰福備五不朽有三聲施無窮兩儀可參公仁

不亡我慟奚益老成是懷知已是德尚饗

祭思質王公文

維某年某月某日太子太保吏部尚書武英殿大學士年眷生嚴訥謹以牲醴之儀致祭于都察院右都御史兼兵部左侍郎思質年丈王公之靈曰偉哉王公人中之龍善根於性德粹於衷家慶相承世胄稱雄公生有自原本先翁其志經濟其學博綜天人是貫今古咸通辛丑之歲第捷南宮由大行人服繡乘驄直氣勁節松挺高峰紛華靡麗

雲浮太空奏議匡時狂瀾障東姦畏良愛日夏日冬虜塵朔揚公義激中安攘壯猷達于宸聰

天子曰咨惟汝貞忠謂匪外飾允發丹悰自是簡任超濟顯融凡所條畫莫不信從公感殊遇殫心奮庸誓報國恩毅不顧躬疆賴不聳烽沉夜紅移師鎮南島夷戢踪又移于北益建奇功獻馘孔多勲績實崇當路嫉之邪翕而攻正人啣冤輿情所恫二嗣卓卓藝苑擅工宗廟瑚璉郊社璧琮科甲聯翩蜚聲有鴻呌閭籟帝澤沛隆隆詔還公官如

獲楚弓奉公榮妥馬鬣新封天祐忠孝吉祉攸鍾
佳城瑞氣永見鬱葱某伏在苦塊寓奠臨風緬懷
揮淚痛奠拊胸陳詞聊慰心則何窮尚饗

祭仲山王公文

維萬曆四年歲在丙子十月庚申朔越七日丙寅
具官通家眷生海虞嚴訥謹具清酌庶羞致祭于
大憲伯封君仲山王老先生之靈曰錫介句吳鄉
有季子博物好義遠利若賦風清節凜尚染其鄉
公起諸生志識非常官取甲科周旋卽署其學矛

森其文苞翥臬臺秉憲邦直是司道不苟徇公則
拂衣鴻冥梓里皜然弗滓所好是從談經講藝餘
長優贍旁及繪家翰墨淋漓見者稱嗟戶為屨滿
肆為紙貴三絕派傳殆遍海內公雖顯宦儒則列
仙雅類延陵高致翩翩公有賢郎余昔薦士行誼
醇篤亦延陵類今官銓省克冠群倫辭榮侍公孝
邁瞻雲昨承訃余公忽捐館人琴俱亡豈勝驚惋
我今奠公叩公素幃罄咳靡聞昔愛允思公名播
揚公後昌熾公如有靈良可忻慰尚饗

祭何春泉年伯母太孺人文

維乾坤之合德兮，竅伉儷於隱陽。肆母則之克令兮，于父道乎有光。嗟孺人之婉淑兮，佩蘭蕙以自芳。承華胄之善慶兮，玉在璞而含章。既結縞以于歸兮，配君子而日襄。逐宦跡以翱翔兮，被寵命於明光。內潔修以中饋兮，外解佩之鏘鏘。籩豆肅其靜嘉兮，琴瑟盜其相羊。彩鳳溘以先逝兮，貞慕侶之孤凰。矢栢舟以自勵兮，懷兩髦而弗忘。聚德馨而莫可揜兮，挺玉樹之顛昂。逝鵬霄而遙轉兮，漸

鴻達而高翔。塞曲江之文杏兮，奉清廟之珪璋。既秉直於彤管兮，又輸忠乎皂囊。既臣節之茂著兮，徵毋教之洋洋。宜天寵之榮錫兮，被帝命之焜煌。胡訃報兮，倏度懷秀質兮，摧傷望滄渤兮，渺渺向白雲兮，茫茫徒蓼莪兮，在念柰萎萱兮，空堂維予黨兮，令嗣並建禮兮，趨殯思命駕兮，千里恨不見兮，徬徨軫余情兮，何極聊一薦兮，椒漿

祭一江顧公文

維隆慶三年歲次己巳十一月庚午朔越二十四

日癸巳太子太保吏部尚書武英殿大學士眷制
生嚴訥謹以香帛牲醴之儀致祭于進階亞中大
夫山東按察司副使一江顧公之靈曰惟公秀發
名宗夙稟英質庭訓是承夔夔翼翼志傑才偉濟
之勤敕何大弗勝何艱弗克登科筮仕譽動邦國
踐更于外屢奏殊績魏故名郡守其疆域于蕃于
宣不遑寢食仁義並行拊摩斷擊戶晏刑清厨傳
不飾課牘所上豈徒稱職海內民牧惟公是式廟
堂推公謂可槐棘借副臬憲行且超陟公竟拂衣

寶其田穡公之在官砥礪清白公之在鄉秉持正
直如公品倫良不易得我雅敬公公亦我識相與
以道相契以臆公今已矣使我心惻且悲縉紳星
稀曉刻致奠感懷尤軫名德尚饗

祭譚母錢孺人文

維萬曆四年歲次丙子五月癸巳朔越九日太子
太保吏部尚書武英殿大學士通家眷生嚴訥謹
以香帛牲醴之儀致祭于儲贈譚母錢孺人之靈
曰惟靈淑鍾邃壺秀毓名宗芳姿慧質迥邁凡庸

作合湖翁百夫之傑泳游方舟自其髮結壯圖偃
蹇思潤其廬揮霍經營積貯充閭綺食鳴鐘華堂
甲第業構栽魏孰匪其勩百千家指政馭以嚴即
在夫子高山仰瞻既昌厥家猶穀爾後婦道母儀
才行胥茂訥也追惟孩幼生甫三齡先子湖翁共
侍郡庭猥以通家拜母邸舍母視余母妯娌不下
恩推烏屋寘余于懷曰爾孺子五色稔稔荷以金
錢誘我識字一字一錢日拜十賜况時吾母憂患
方罹母慰藉之盍少俟兇詎意風雲乃有今日我

心感勒誓與生畢吾母頃逝辱母過臨相嚮長號
流淚橫襟茲辰何辰母亦在殯訃音倏聞悲曷可
忍我悲母亡誼實殊常若母之生福則匪涼富壽
康寧九齡景迫子迪詩書橋門引翮使母少竚行
被恩光溘爾仙遊尚俟燎黃尚饗

祭巫澗沈公文

維隆慶三年歲次己巳秋八月癸酉朔越二十八
日己巳太子太保吏部尚書武英殿大學士眷制
生嚴訥謹以牲醴香帛致祭于明故奉訓大夫趙

州守契兄丈巫澗沈公之靈曰自余之少與公同
遊揆筆攄詞公也無儔其學汪洋其中玄邃鼓鑄
精工金鎔鑪鞴余先竊第公薦于鄉魁首哀然華
萼相望齊美士衡人云雙璧唾手省元輿論不易
久之靡售屈首選場小試方州露其刃鉅案牘鉛
朱非公所樂措笏南山傲寄寥廓風移俗轉治亦
稱嘉趙郡繼麾甘雨隨車吏事雖優用違公謂公
乃達生視如逆旅朱轡南返松菊我娛擊缶歌呼
飲食宴需蒙莊漆園安石別墅曠世一心委運來

去樂終悲至沉淪九原哀此良朋幽顯隔焉有道
弗施有才靡究徒有遺文足垂於後余追曩昔詎
忍斯今山陽之笛廣陵之琴匍匐登堂徒見丹旒
躬進魯尊何任悲悼尚饗

祭昆湖瞿公文

維隆慶三年歲次己巳秋八月癸酉朔越二十八
日己巳太子太保吏部尚書武英殿大學士姻家
制生嚴訥謹以清酌庶羞之奠致祭于嘉議大夫
禮部左侍郎兼翰林院學士昆湖瞿老先生尊親

家之靈曰惟公氣鍾光岳秀軼時流禎為郊麟價
則廟球遡厥英年後譽已收賈傳之匹蘇子之儔
甲辰南宮薦冠九州旋亞殿臚翰院纂修乃直制
垣乃奉東頭遂由宮銜章綰瀛洲國學銓衡踐更
于留召遷秩宗備克咨疇席末暇溫疾已綢繆乃
疏于上允俞其休余少角藝與公同遊仕復同
官戚締好述余實知公洞其裏幽氣和而剛語直
而柔才俊而雅學邃而周玉憂金鏘實歛葩抽當
其在朝何務弗優造士代言試典春秋夙夜勤勞

報効宸旒今雖遜荒望蔚嵩丘再宣有期一疾
靡瘳懃遺嗟興儀式悠悠有子既立克紹箕裘公
魂斯慰帝鄉優游我陳一觴椒漿滿浮慟匪由公
伊誰之由尚饗

祭文川周舅翁文

維隆慶四年四月二十五日我尊舅翁鄉大老順
天解元文川先生周公卒其甥壻太子太保吏部
尚書武英殿大學士嚴訥哭之越旬有二日始克
具奠先生幕下而告之以文其文曰嗟昔諸姬兮

盛于汧岐羌伯仲之來吳兮化椎結以冠縷若聖
哲之苗裔兮被福慶于遐世稟精氣而降靈兮采
三秀於芳歲鸞與麟其疋伍兮瑾并瑜而握之猗
修能豈其歎兮復重之以華詞轍方結淵雲之麗
偉兮雅醇含乎董賈曩藻揆奏記於翰府兮驥空
群於燕野於時氣嶽嶽而切雲兮駢文螭而上征
謂臯夔稷禹其吾徒兮志實銳乎終生何運屯而
道以閉兮鍾竟黜而瓦擊日操瑟立於齊門兮顧
好音者之教僻我實悼夫子之侘傺兮行儻佃而

不前欲翼其轂而進之兮彼又耄期而倦焉遂收
遺經而獨抱兮甘伏生以同老識化權之大全兮
皆盈虧與榮槁行矍楷而言箴石兮士豈徒號乎
儒宿籍令君席勢而柄時兮譖胡不能電犇而颺
逐故跡雖晦而譽光兮宛東山之名傳苟西伯之
獵渭陽兮君應載之以後輅頃部使者數過而式
閭兮因表之以揚徽又不錫爾以嘉稱兮曰人瑞
而第巍學者方丰企而景行兮若子同之宅里於
乎人之云仁兮梁木壞兮焉倚余夫君之甥耦兮

忤籍蘊之謏薄君誤待以為國士兮詫碧鶴乎選
幕茲幸乏備於軸鼎兮承夫君之啓佑豈推烏愛
於渭陽兮獲覃寵於猥陋余敬薦此芳醕兮情苑
結而鹽傷懷啣戢而罔伸兮淚汎瀾而沾裳尚饗

嚴文靖公集詩附後

嚴文靖公詩

五言古

夏夜同王雲竹曹紀山諸侍御飲董潯陽太
史新第分韻得栖字潯陽嘗寓予館余至
自楚潯陽遂遷居焉

吾廬遠喧囂僻在帝城西君子卜新構乃自吾廬
移所據固爽塏清絕亦幽栖閒夜集友生觴酌臨
前墀丹榴正敷英業竹綠始齊葳蕤映明燭華曜
相參差玄談間清譁逸思縱橫飛相對各盡歡厭

厭不知疲薄言問迴車陌上號曙雞

出自薊北門行

虜騎入天山驚塵揚薊堞列亭起烽燧日夜逼甘
泉朔風正蕭颯胡騎何精堅天子急命將分閫使
救邊虎符五道出羽檄萬里傳壯士執羈去用命
嫖姚前連營薄休屠結陣衝左賢劔戟光耀日鉦
鼓聲動天寒沙漲踈勒苦霧埋祁連磧窮飛狐道
冰冽武威川奮勇急轉戰恩重微軀捐誓決龍韜
略蕩卷穹廬旃遂斬單于頭歸向橐街縣所志敵

王愜何心勒燕然

徐待御華原年兄巡按雲南有日矣乃置酒

靈濟宮為同館之會席上遂各賦詩贈行

太微切宸居華觀天中懸蘭棖撤蒸暑涼飈含列
錢達人美無度高情薄雲天祇命駕玉駟逝將遠
南填眷眷念所歡冒炎張廣筵勝引樂赴會金羈
共聯翩清虛凌蓬壺駢坐儼靈仙甘醴溢樽罍豐
膳充方圓越謳振逸響泠泠一何妍歡情既以暢
別緒亦復牽逶迤萬里途念子歷山川相去日以

遠欲晤屢經年行矣崇夙志遐土澤元元賞心儻
不隔芳信異遙傳

寄贈師相瑤泉申公

王風紹周道鼎定洽昌期 嗣聖誕冲霄訐謨光
燕貽 宸衷肅 九廟逋穢清四陲承天必崇柱
恭默良所資嘉哉我懿親象夢會重熙 三朝懋
儲納百揆今總齊燁煜賜金佩趨蹌鳴玉墀休休
秉均度藹藹端辟儀予幸仰明訓補袞欽誦舜肇
轉急絃奏用調神鼎滋陽和被窮髮霖澤及雕題

譯貢包濛古珍圖備陸離揚滔息溟澁玄嶽亘坤
維吐渥更虛已忠賢盡來思從龍赫天步捧日耀
咸池衡鑑忝昔預鴻猷叨夙知瞻台忻理燮銘帛
慰涓私

秋日汎舟過朗城菴

孤舟興不淺日暮浮芳塘撫景自斟酌擊榜歌滄
浪秋水連天碧清風傳桂香渚鷗閒自得狎我為
翱翔

丹泉詩

仙人昔鍊丹丹就貯深井輕舉凌紫霞列缺貫倒
景千歲丹化洽雙翔度虞嶺冽彼井內泉玉液浸
雲冷君今調靈藥汲泉動修綆和以沆瀣精餐之
可彌性不見君室中五綵發丹鼎

賀邑丞石君有序

思菴石君以贊府蒞吾虞為治廉而平明
而寬處煩應卒鋌刃不頓嘗有懷金暮投
者君笑曰若不知吾為清白吏後耶峻却
之余始聞是則已心賢君歲甲申仲夏臺

使察君有異政特褒嘉焉邑縉紳某等春
元某等槩庠士某等皆沐君惠風請余一
言以賀君余時方養疴丘園久謝筆研顧
邑寮之賢如君者洵斯世之鸞鳳也緇衣
之懷久矣蘊積胡能默遂為短歌一章以

頌明德

懸綬佐茲邑疇昔幾英哲蕭張炳辭翰常鄭著廉
節清輝映石門千歲固不滅之子越中秀蒞吳紹
先轍智刃輕萬紛德風起枯槩有農歌贊府無塵

上冠纈澤蘭遜幽芬高霞謝孤潔誰云沉下僚自
得古人烈茗華不期采深山薦闥闕明月生海南
楚宮夜昭晰有微終見珍棘棲豈鸞穴不聞登岳
者龍門固君列

五言律

德州承戴戶部渾菴冒雪移樽來訪

雪夜山陰棹曾聞訪戴迴誰云安道駕却為子猷
來瑞色凝瑤席輕花撲錦杯故人情可炙吾欲報
瓊瑰

送洪芳洲

自若南國去芳譽日遙傳交結青雲士裁成白雪
篇相懽清冷夕相戀別離前江上蘭茗發聊因采
贈焉

月夜與曹紀山偶集王雲竹館時徐華原往
按填南分袂未幾因共憶之

肅穆仲宣廬逍遙子建輿美人歡命席涼月正臨
除杯影飛棊局燈花炫草書忽談中冷好相對各
懷徐

董潯陽修同館之會予時不赴以詩投之
敬讌臨芳夕追歡搃上才最憐花裏月晴映掌中
杯問我胡無暇茲遊乃未陪何當乘後會佳興為
君開

洪芳洲至自南都過曹紀山因宿烏呂沃洲
王雲竹携酒邀予共往觴之席上漫賦

開樽涼夜永下榻故人留酒至還斟酌情真畧勸
酬微言相與析徒食耻為謀各勉日新志無令芳
歲邁

送王雲竹

玉曙攻文侶烏臺秉憲郎才名掀日月清操凜冰
霜禹穴窺秦望天台駕石梁清風徐攬轡披拂繡
衣香

中夜對月

城闕虛無裏樓臺縹緲中寒烟飄去鵲明水渡來
鴻雲物千秋似塵氛一笑空平生寸心白持此荅
重瞳

其二

良宵不可得清賞詎相違露濕姮娥袖天寒織女
機烏兔驚漠漠花意愜輝輝萬里邊城客防秋正
未歸

元日宴徐省郎館用唐韵

青韶迎甲夜華度照青陽燭吐金蓮燄炉飄綠桂
香樽前邀翰墨斗際炳奎章何但歌鐘沸能忘刻
漏長

雨中聞鴈

冀北隨陽鴈朝來帶雨鳴霧深難辨影風度忽傳

聲嘹唳空餘唳微茫眇去程不須傳足帛漢已返
蘇鄉

見月率詠

皓質悠悠起明輝冉冉多森羅韶列宿橫亘隱長
河綺席金樽舉榆閔鐵騎過萬端忻感意子夜有
吳歌

五言排律

送胡青崖提學江西

夫子今安定傳經自偃商遠心探理窟餘藝擅詞

場日月開青瑣雲霄拜夕郎赤衷匡社稷清譽起
封章歷宦猷逾壯為儒道益光蕙蘭當畹茁桃李
向蹊芳鹿洞懸匡阜龍門控楚疆憲臣新蒞學多
士共升堂瑞旭鷓鴣翥康衢駿足驥君看奎壁曜
騰彩應文昌

忠弼堂

帝簡資王佐師臣翊聖君持衡長秉直荷寵轉輸
勤仙宇含雲藻天題煥斗文圖開龍嶠側堂啟鳳
臯瀆勝地薇垣應隆息紫極分從今昭一德千載

著功勳

瓊翰流輝樓

雲構開仙第龍文煥帝章朱華呈寶瑞彤霽叶明
祥玉笈綸音閱璇題睿翰揚山川迎氣色日月讓
輝光賀燕迴雕檻翔虹落畫梁應知多景福垂耀
與天長

聞海嶽許公入相志喜

軋斷求台鉉鴻材入廟廊醴泉三殿涌寶氣五樓
祥丙魏同興漢臯夔並佐唐徽音含華嶽苞彩耀

扶桑黑髮調元早丹心照極芳趨庭榮劍履締國
榮珪璋柳拂黃扉曙花迎紫綬香鹽梅和鼎饌黼
服補宸章德近龍顏懋身從聖曆康麒麟
圖貌顯鴛鴦仰儀光濯藻山河潤宣猷社稷昌老
臣遙戀闕稽首誦明良
投贈張司馬二十六韵有序

大中丞岵峽張公督撫浙省始戢亂軍繼
平狂寇

聖天子嘉乃丕績晉陟司馬予辱公舊治於

其將行遙贈詩以申賀云

聖代開神御英靈得大夫鴻文追漢固竒略比齊
吾越徼因饑戍轅門起振枹殲夷甘犯律庚癸奮
爭呼奏牘驚宵旰台顏眷海隅轂推隳懦豎俎
折藉珍儒簡辟從群望僉賢協

帝俞保釐頒特敕節制剖新符隼旆舜廷下鋒
車遞驛驅文成操幄運高密効籌紆纛建明霜肅
綸宣茂澤敷片言安社鼠一劔斷封狐緩帶無晨
警椎牛有衆愉坐收巡壘績還謀弄潢徒扇焰希

焚玉揚飈欲溷郭撫黎原奉 詔懷德豈專誅易
宓從新化開誠歎後輸妖氛銷斥候太白靜螿弧
閩法酬恩重臣躬亮采殊史君今駐浙羊叔舊綏
吳鼎鉉慚詮謬蘭金辱佩孚拜緘情自切託藻誦
非諛錦服膺中召文衡上北都相聞緣接壤欲餞
阻修途努力毗

明主和衷贊顯謨崇臺彰獻納瞻爾蔚雲圖

七言古

秋風辭

秋空霜寒月明裏秋風蕭條中夜起城烏驚栖翻
復止海鴻飄雲聲入耳征夫迢迢戍千里空房孤
眠夜如水夜如水心悠悠黃沙白草邊塞秋秋風
日夕吹隴頭胡兒部落爭羶裘寒衣不到征夫愁
送武子南還賦得雨花臺

高山鬱蒼紫高臺亘山起昔人談玄坐揮塵白日
天花下如雨花凝寶礫瑞光浮百尺嵯峨壯帝洲
芙蓉翠柳叅差見天際長江臺下流結駟駢駢秣
陵客僂標不染風塵色南歸獨上高臺嘯聞看冥

鴻矯雙翼

燕臺行送客

燕王舊築黃金臺，干雲直上何崔嵬。一時賢士投
所好，劇辛鄒衍爭先來。此臺歲深不復在，長留英
光照千載。君今駿足千里馳，應有千金招自隗。

送張為山年兄推吾蘇賦得肅阜吟

君不見金精肅變躄靈阜，翠微龍盤控南斗。魚腸
大壑埋三千，紫氣宵寒鬼神守。自從館娃歌舞歇，
此地空憐跨吳粵。莓苔繡錯生公堂，績藻晶熒梵

王闕山麓清溪二道分，山頭珍木碧紛紜。層臺突
倚千人石，傑閣晴開萬頃雲。中有名泉一泓瀉，惠
澗金冷此其亞。輓轡垂綆飛白虹，玉鏡函天凍朱
夏。使君臨遊試酌此，使君清名勝此水。

長洲行送趙尋齋年兄令長洲

太湖山清烟水蒼，太湖北畔吳洲長。吳王昔畋此
翱翔，牙樯錦纜纏碧楊。金鼓動天旌羽光，左挾烏
號右紅妝。鳥飛獸奔狗馬勅，別苑追歡列清讌。銀
燈星繁爛綺羅，烏栖喧聞子夜歌。今來不似吳王

日霧町雲畦但鉏鉏君侯帷車駐芳草陽春無邊
白日皎

詠荷花

淼淼江湖鄉迢迢洲渚長英英澤芝花亭亭水中
央吐秀迎風煖含靈濯露涼妙態玲瓏奪夜月冶
容翕艷凌朝陽暎水晴翻雲錦章錦心嬌染雙鴛
鴦即無游仙汎為航洵有靚女看明妝服可克上
藥飲可寫流觴山丹固羞艷水沉亦慙香兼葭蒼
蒼天欲霜紅衣落盡珠滿房宇宙之麗不可常誰

能托詠傳其芳猗嗟此花君子行千秋萬歲永相
望

南村行贈周將軍

將軍徃徃有佳趣幽尋欲避紅塵路金韉玉勒出
都門飄然策向南村駐南村風光絕可娛廬井悠
然成一區長林中穿古道迥野水曲繞平沙紆牧
豎畊童日夕俱鳴鷄吠犬接城隅秦人舊侶桃源
洞武侯別業南陽都當村柳樹大如斗一望青青
連細柳村邊隙隴瓜離離瓜蔓乃自東陵移此中

樂事不可罄秋月春風鎮常勝
村酒足酣游
况有清歌愜清聽嗟嗟將軍頎且碩七德龍韜蘊
奇策只今笑傲隱金門方朔何妨長執戟

七言律

楚邦藩臬諸公邀登黃鶴樓

層樓雄瞰楚城隈四野風烟面面開鄂渚秀峰橫
地出漢江晴水抱洲迴清虛近接仙人館綺錯旁
臨帝子臺日暮玉笙吹不歇却疑黃鶴復飛來
九江王巖潭鄉丈郡伯邀登海天閣

海天香閣倚雲開地主携賓覽勝來樂奏土風元
自合杯傳玉液重相催簾前廬嶽千尋起樹裏江
流九派迴可信登高攻作賦聞君早有仲宣才

登齊山和杜牧之韻

山腰亭子鬱暈飛戶外三奇列翠微石鼓洞邊吟
對酒仙人橋畔坐忘歸綠搖林樾含新雨金躍湖
波晃夕暉更欲上頭探勝槩不妨巖溜滴絺衣

送沈江村憲副之楚

白雲司裏郎官筆龍瑞宮前刺史軒起草久推裴

楷最攀棘爭戀寇怕賢新從魏闕承恩敕言向荆
湖理戍田他夜月樓清嘯發定聞黃鶴和江天

慶源堂

蓬壺別業五湖邊猶記仙宗卜勝年人傑搃看乘
駟馬地靈先為集三鱣瓊瀾洛汭遙迴合紫氣函
閔近接連袞袞後賢真玉峙戟門長映錦衣鮮

世芳樓

重甍懸榜煥丹青上相高居珥漢貂檻外河流環
北極窓間山翠疊中條槐庭竹榭雲虹近鳳敕龍

函雨露饒欲識台階增世業絲綸黃閣正岩堯

登金山

渺渺烟沙接素秋停橈還此一躋遊長江湛碧開
僧眼列嶂微青淨佛頭野曠遙看晴靄合亭空饒
有白雲流六朝今古俱岑寂惟有漁歌起蓼洲

中秋對月

夫容清月鳳凰城露白秋堂碧霧輕一歲未令今
夜減百年能得幾宵晴雲間鸞鶴霓裳曲海上神
僊赤石英楚奏燕歌俱感激塞垣江國重含情

贈周總戎

萬年陵闕鬼神朝，萬里輿圖王氣遙。
黠虜雲中驅，冒頓將軍天上出。
嫖姚龍岡疊翠牙，旗閃象衛盤空鐵。
柱標乘障坐收青海箭，控弦誰射黑山鵠。

諸將

胡騎乘秋寇玉關，銅鞮塵色暗天山。
狼烽直照臯蘭北，羽檄交馳碣石間。
按劍九重方赫怒，擁旄諸部莫寬顏。
丹青欲繪麒麟閣，須虜名王繫頸還。
聖誕習儀玄元宮

栢臺飛鵲曙星稀，桂闕鳴雞曉月微。
仗簇紫虛凌羽駕，香飄丹殿襲芝衣。
天宮窈窕群僊集，宸極巍峩萬國歸。
欲向瑣闈歌聖壽，試開金籙問玄機。

詠菊

長安重九菊英鮮，徙倚堂階靜可憐。
楚俗舊餐同大藥，晉人高賞寄餘篇。
風霜益見寒香遠，天地應知晚節全。
為捧一杯甘谷水，黃金臺下祝堯年。

師相瑤泉申公五十誕慶奉賀

卿雲臚唱蚤登庸，今日

明良特會逢春盎化鈞調寸籥霖濡膏澤遍宸封
黃扉七載齡終艾前席

三朝眷久鍾歷考令公徵有淑上台佳氣正重重
其二

肅皇聖哲亶知人親拔廷魁得碩臣經世文章華
黼黻格

天勲業炳麒麟休休雅度簪紳望蹇蹇忠忱社稷
身最是我吳誇有范忻先海宇誦生申

送桑守白尹清流

肅竹初分出建章牙檣南指入閩鄉賦題鐵研文
空就心瑩冰壺化甫強薦牘昔年周俊又徵書他
日漢循良藝林宦苑君家擅新命於今更有光

七言絕句

桃溪詩贈孫山人

桃花千樹繞溪斜溪水盈盈漾錦霞溪上主人無
俗慮但將春色染桃花

嚴文靖公詩



嚴文靖公集後序

蓋吾師嚴文靖公之捐
館舍不佞敬適待罪填
撫三吳用故事為公丐
上恩悉從異數而公嗣鄉

進士治等復摻公生平
著作裒為集若干卷以
授劄氏而屬末敘於不
佞不佞敬幸備公門下
士而序公所為不朽者

則何敢辭竊惟公以文
學為

世廟侍從臣晚優遊林泉
日多而椽筆所攄藻揚
屬何厪厪若此聞之進

士君亦公始為太史時
實豐制作而徃徃削不
留稿已即供奉
世廟於內苑公性忠謹
意應

制遂不自理鉛槧比為冢
宰為亞相日益不暇歸
多暇矣感

上恩以病予告顓務葆真
養性布德惠於鄉里諸

以文來請者不得已而
後應之諸孤又緣公意
不在多為簡其疑似者
門人具稿而公為潤色
者皆弗梓以故其存笥

止此敬伏讀而歎曰美
哉洋洋乎其盛世之文
耶然以為足以盡公者
未也士君子遭時行志
結遇

聖主施及萌隸功烈垂乎
竹帛聲稱遠於來世彼
寧以卮言妍辭為愉快
哉即有之而徃徃以其
大者掩而弗稱故燕許

大手筆潤色一代而文
苑弗列惟嘔肝剝心沈
冥汗青之士稱為此其
人舉所不得施之志而
盡付於空言以蘄知於

後所不知之人則可悲
矣文靖公事

世皇初為應制文非其好
也嘉靖季屬佞相屏位
徐文貞公建弘濟之勲

而公為太宰首與協贊
登用正良幹旋化運迄

於今

三世賴之逸夫爰立經綸
屯亨甫建而超然遐覽

脫屣相位讓元功於同
列留餘澤於子孫時止
時行道光明矣夫子之
文章其在茲乎其在此
乎今觀其詩若文婉縟

豐腴渾渾淪淪不務雕
琢以塗人耳目意在闡
性靈持體要而止蓋不
欲與文苑苦吟之士鬪
長爭能相道然也敬素

暗不能嫻文辭獨藉公
甄陶力位備九卿末亦
欲希公為其大者故尤
不能一一而名公文也
輒書所見而附於簡末

如此

賜進士出身都察院右副
都御史奉



勅總理糧儲提督軍務兼
巡撫應天等府地方門



